

petiis Græcorum regibus et primoribus missis contra Trojanos, contra Epirotas, contra Persas, contra Romanos. Quod autem in maximam rapit admirationem sunt decem horrenda bella contra Romanos gesta usque ad tempora Julii Cæsaris, atque alia posteriora quæ temporibus Octaviani Augusti, Marci Aurelii, Trajani aliorumque imperatorum in Illyrico commissa fuere. Neque minus allicient lectores dissertationes de antiquis Illyriorum vestibus, moribus, festis, nuptiis, funeralibus, ritibus, ludis, numinibus, magistratibus, commercio, divitiis, civitatibus populo frequentibus, robore, cultura, ignavia, hospitalitate, vicissitudinibus earumque causis et sic porro.

At qui in hac scribenda historia res solas adduxerit, quas ex veteribus Scriptoribus extraxit, dimidium dumtaxat operis fecisse censendus est. Oportet enim ubicunque occasio tulerit, plurima ex ratiocinio suis locis intexere, quæ in posterum huic Genti utilitati et gloriæ esse queunt: contra quid turpe atque indignum sit, audacter exponere. Sed potissimum enitendum est, ut illa quæ passim plus minusve grassantur abjecta præjudicia suæ religionis, suæ sectæ, suæ religionis, sui ritus, sui regiminis, suæ dialecti, unde turpissima odia, dicteria, mendacia, persecutiones proficiscuntur, atque optimam secus docilemque Illyriorum indolem et animum